

四庫全書

集部

欽定四庫全書

劔南詩彙卷三

宋 陸游 撰

飯三折舖舖在亂山中

平生愛山每自歎舉世但覺山可玩
皇天憐之足其願著在荒山更何怨
南窮閩粵西蜀漢馬蹏幾歷天下半
山橫水掩路欲斷崔嵬可陟流可亂
春風桃李方漫漫飛棧凌空又竒觀
但令身健能強飯萬里只作遊山看

小市

小市門前沙作堤杏花雖落不霑泥客心尚壯身先老
江水方東我獨西
整憩軒窗仍汎掃
遠遊書劔亦提攜
子規應笑飄零慣
故傍茆簷盡意啼

酒無獨飲理

酒無獨飲理常恨欠佳客
忽得我輩人豈計晨與夕
少年事虛名歲月駒過隙
自從老大來一日亦可惜
糟丘未易辦小計且千石
頽然置萬事天地爲幕席
人生如

刀礪磨盡要有日不須荷鉞隨沉問幾兩履

畏虎

滑路滑如苔澀路澀若梯更堪都染下一雪三日泥泥
深尚云可委身餓虎蹊心寒道上跡魄碎茆葉低常恐
不自免一死均豬雞老馬亦甚畏悄悄不敢嘶吾聞虎
雖暴未嘗窺汝棲孤行莫不止取斲非排擠彼讒實有
心平地生溝谿哀哉馬新息惹成珠犀

戲題

走馬平欺刺繡坡放船橫截亂絲渦從來倚箇心平穩
遇險方知得力多

蟠龍瀑布

遠望紛珠纓近觀轉雷霆人言水出奇意使行人驚人
驚我何得定非水之情水亦有何情因物以賦形處高
勢趨下豈樂與石爭退之亦隘人強言不平鳴古來賢
達士初亦願躬耕意氣或感激邂逅成功名

題梁山軍瑞豐亭

我行都梁窘風雪史君喜事能留客瑞豐亭上一尊酒
渺渺郊原水初白峽中地福常苦貧政令愈簡民愈淳
本來無事只畏擾擾者才吏非庸人都梁之民獨無苦
須晴得晴雨得雨史君心愛稼如雲時上斯亭按歌舞
歌闌舞罷史君醉父老羅拜豐年賜聖朝尚實抑虛文
縱產芝房非上瑞

馬上

殘年流轉似萍根馬上傷春易斷魂烘煥花無經日蕊

金匱山房集 卷三
漲深水過去年痕迷行每問樵夫路投宿時敲竹寺門
不信太平元有象牛羊點點散煙村

鄰山縣道上作

微雨晴時出驛門亂鶯啼處過江村挽花醉袖霑餘馥
迎日征鞍借小溫客路一身真吊影故園萬里欲招魂
鬢毛無色心猶壯藉草悲歌對酒尊

鄰水延福寺早行

化蝶方酣枕聞雞又著鞭亂山徐吐日積水遠生煙淹

泊真衰矣登臨獨惘然桃花應笑客無酒到愁邊

酒偶盡市

酤不
可飲

岳池農家

春深農家耕未足原頭叱叱兩黃犢泥融無塊水初渾
雨細有痕秧正綠綠秧分時風日美時平未有差科起
買花西舍喜成婚持酒東鄰賀生子誰言農家不入時
小姑畫得城中眉一雙素手無人識空村相喚看縑絲
農家農家樂復樂不比市朝爭奪惡官遊所得真幾何

我已三年廢東作

過廣安吊張才叔諫議

春風疋馬過孤城欲吊先賢涕已傾
許國肺肝知激烈照人眉宇尚崢嶸
中原成敗寧非數後世忠邪自有評
歎息知人真未易流芳遺臭盡書生

果州驛

驛前官路堠纍纍歎息何時送我歸
池館鶯花春漸老窗扉燈火夜相依
孤鸞怯舞愁窺鏡老馬貪行強受鞿

到處風塵常撲面豈惟京洛化人衣

留樊亭三日王覺民檢詳日攜酒來飲海棠下比

去花亦衰矣

留落猶能領物華名園又作醉生涯何妨海內功名士
共賞人間富貴花

又

石衛尉家錦步障移在樊家園館中醉到花殘呼馬去
聊將俠氣壓春風

柳林酒家小樓

桃花如燒酒如油緩轡郊原當出遊微倦放教成午夢
宿醒留得伴春愁遠途始悟乾坤大晚節偏驚歲月遒
記取晴明果州路半天高柳小青樓

南池

杜詩所謂安知有蒼池萬
頃浸坤軸者今已盡廢

二月鶯花滿閬中城南搔首立衰翁數莖白髮愁無那
萬頃蒼池事已空陂復豈惟民食足渠成終助霸圖雄
眼前碌碌誰知此漫走輶祠乞歲豐

池上有漢
高帝廟

唐長慶中南池新亭碑在漢高帝廟側亭已失所
在矣

池廢新亭亦已無遺碑半滅臥春蕪文章綺靡雖非古
今代詞人不辦渠

間杜鵑戲作絕句

半世羈遊厭路岐憑鞍日日數歸期勞君樹杪丁寧語
似勸飢人食肉糜

鼓樓舖醉歌

書生迫飢寒一飽輕三巴三巴未云已北首趨裋斜
囟出門去裘馬不復華短帽障赤日烈風吹黃沙
儼裝先晨雞投鞭後昏鴉壯哉利閭閻崖谷何谿
畎地荒多牧卒往往聞蘆笳我行春未動原野今
無花稚子入旅夢挽鬚勸還家起坐不能寐愁腸
如轉車四方丈夫事行矣勿咨嗟

登慧照寺小閣

少年富貴已悠悠老大功名定有不歲月消磨閱
亭傳

山川遼邈弊衣裘殺身有地初非惜報國無時未免愁
局促每思舒望眼雖非吾土強登樓

春雨

江頭一夜雨曉路無新花我今為陳人感此重歎嗟義
和挾兩曜疾走不可遮古今俛仰間那暇惜物華

風雨中過龍洞閣

飄然醉袖怒人扶箇裏何曾有畏塗卷地黑風吹慘澹
半天朱閣插虛無闌邊歸鶴如爭捷雲表飛仙定可呼

莫怪衰翁心膽壯此身元是一枯株

驛舍海棠已過有感

淒涼古驛官道傍朱門沈沈春日長
暄妍光景老海棠顛風吹花滿空廊
物生榮賴固其常惜哉無與持一觴
遊蜂戲蝶空自忙豈知美人在西廂
我雖已老猶能狂佇立為爾悲容光
盛時不遇誠可傷零落逢知更斷腸

籌筆驛

有武侯祠堂

運籌陳迹故依然想見旌旗駐道邊
一等人間管城子

不堪譙叟作降牋

嘉川舖遇小雨景物尤奇

一春客路厭風埃
小雨山行亦樂哉
危棧巧依青嶂出
飛花併下綠巖來
面前雲氣翔孤鳳
腳底江聲轉疾雷
堪笑書生輕性命
每逢險處更徘徊

老君洞

有石刻載唐明皇幸蜀見老君於此

丹鳳樓頭語未終
崎嶇蜀道復相逢
太清宮闕俱煨燼
豈亦南來避敵鋒

大安病酒留半日王守復來招不往送酒解醒因

小飲江月館

江驛春醒半日留更煩送酒為扶頭柳花漠漠嘉陵岸
別是天涯一段愁

金牛道中遇寒食

乍換春衫一倍輕況逢寒食十分晴
鷺穿驛樹惺惚語馬過溪橋蹀躞行
畫柱綵繩喧笑樂豔粧麗服角鮮明
誰知此日金牛道非復當時鐵馬聲

紹興初敵大入至金牛而遯

曉發金牛

客枕何時穩忽忽又束裝快晴生馬影新暝坼花房沮
水春流綠嶓山曉色蒼阿瞞狼狽地千古有遺傷

自金牛以

西皆明皇

幸蜀路

山南行

我行山南已三日如繩大路東西出平川沃野望不盡
麥隴青青桑鬱鬱地近函秦氣俗豪鞦韆蹴鞠分朋曹
首宿連雲馬蹄健楊柳夾道車聲高古來歷歷興亡處

舉目山川尚如故將軍壇上冷雲低丞相祠前春日暮
國家四紀失中原師出江淮未易吞會看金鼓從天下
却用關中作本根

南鄭馬上作

南鄭春殘信馬行通都氣象尚崢嶸迷空遊絮憑陵去

曳綫飛鳶跋扈鳴落日斷雲唐闕廢

德宗詔山南比兩京

淡煙芳

草漢壇平

近郊有韓信拜大將壇

猶嫌未豁胸中氣目斷南山天

際橫

城中望見長安南山

和高子長叅議道中二絕

梁州四月晚鶯啼共憶扁舟罨畫谿
莫作世間兒女態
明年萬里駐安西

又

豐年食少厭兒啼覓得微官落五谿
大似無家老禪衲
打包還度棧雲西

次韻張季長題龍洞

我昔謁紫皇翳鳳驂虬龍俯不見塵世浩浩萬里空
謫

墮尚遠遊忽到漢始封西望接蜀道北顧連秦中壯哉
形勝區有此蜿蜒宮雷霆自鞶韞環玦亦璵璠石屋如
建章萬戶交相通來者各有得盡取知無從憑高三歎
息自古幾英雄老我文字衰揮毫看諸公

次韻子長題吳太尉雲山亭

參謀健筆落縱橫太尉清罇賞快晴文雅風流雖可愛
關中遺敵要人平

送劉戒之東歸

去國三年恨未平東城況復送君行難憑魂夢尋言笑
空向除書見姓名殘日半竿斜谷路西風萬里玉關情
蘭臺粉署朝回晚肯記羸官數寄聲

周元吉蟠室詩

天下有廣居非阿房建章賓餞日及月闔闢陰與陽山
川坦然平何者為藩牆孔公暨瞿聃同坐此道場哀哉
世日隘肝膽分界疆蹙縮戰蝸角崎嶇走羊腸周先早
得道所證非復常小室古城隅宛如野僧房能容人天

衆雜沓來燒香三萬二千人各據獅子牀實際正如此
切忌錯商量須彌芥子話今夕當舉揚

送范西叔赴召

天涯流落過重陽楓葉搖丹已著霜衰病強陪蓮幕客
淒涼又送石渠郎杜陵雁下悲徂歲笠澤魚肥夢故鄉
便恐從今長隔濶舊交新貴例相忘

又

欲駕征車勸小留南山南畔更逢秋數聲過雁催行色

一醺昏燈話別愁自昔文章闢治道即今臺閣要名流
白頭尚作書癡在賸乞朱黃與校讐

寄鄧公壽

高標瑤樹與瓊林靈府清寒出苦吟海內十年求識面
江邊一見即論心紛紛俗子常成市疊疊微言孰賞音
聞道南池梅最早要君攜手試同尋

簡章德茂

殊方邂逅豈無緣世事多乖復悵然造物無情吾輩老

古人不死此心傳冷雲黯黯朝橫棧紅葉蕭蕭夜滿船
箇裏約君同著句不應輸與灞橋邊

自三泉泛嘉陵至利州

日日遭途處處詩書生活計絕堪悲江雲垂地灘風急
一似前年上碛時

木瓜舖短歌

鼓樓坡前木瓜舖歲晚悲辛利州路當車礧礧石如屋
百里夷途無十步溪橋缺斷水齧沙崖腹崩頽風拔樹

虎狼妥尾擇肉食狐狸豎毛啼日莫冢丘短草聲窸窣
往往精靈與人遇我生胡為忽在此正坐一飢忘百慮
五更出門寒裂面半夜燎衣泥滿袴妻孥八月離夔州
寄書未到今何處餘年有幾百憂集日夜朱顏不如故
即今臺省盛諸賢細思寧是儒冠誤

夜抵葭萌惠照寺寓榻小閣

亭驛驅馳髀肉消故山歸夢愈迢迢夜行觸尉那能避
旦過隨僧不待招雨後風雲猶慘澹霜前草木已蕭條

衰遲事事非平日醉裏題詩亦復聊

太息

宿青山
鋪作

太息重太息吾行無終極
冰霜迫殘歲鳥獸號落日
秋砧滿孤村枯葉擁破驛
白頭鄉萬里墮此虎豹宅
道邊新食人膏血染草棘
平生鐵石心忘家思報國
即今冒九死家國兩無益
中原久喪亂志士淚橫臆
切勿輕書生上馬能擊賊

又

淒淒復淒淒山路窮攀躋僕病臥草間馬困聲酸嘶脫
兔截道犇窮狖上樹啼崩湍一何哀下落萬仞谿昏黑
投孤戍洗我衣上泥下愚不可遷大惑終身迷仕宦十
五年曾不飽糠粃客路少睡眠月白聞號難欲行且復
止虎來茆葉低

閬中作

殘年作客遍天涯下馬長亭便似家三疊淒涼渭城曲
數枝閒澹閬中花襍牋授管相逢晚理鬢熏衣一笑譁

俱是邯鄲枕中夢墜鞭不用憶京華

又

挽住征衣為濯塵閬州齋釀絕芳醇
鵲花舊識非生客山水曾遊是故人
遨樂無時冠巴蜀語音漸正帶咸秦
平生賸有尋梅債作意城南看小春

遊錦屏山謁少陵祠堂

城中飛閣連危亭處處軒窗臨錦屏
涉江親到錦屏上却望城郭如丹青
虛堂奉祠子杜子眉宇高寒照江水

古來磨滅知幾人此老至今元不死山川寂寞客子迷
草木搖落壯士悲文章垂世自一事忠義凜凜令人思
夜歸沙頭雨如注北風吹船橫半渡亦知此老憤未平
萬竅爭號泄悲怒

仙魚舖得仲高兄書

病酒今朝載臥輿秋雲漠漠雨疎疎閬州城北仙魚舖
忽得山陰萬里書

自閬復還漢中次益昌

北首褒斜又幾程
驕雲未放十分晴
馬經斷棧危無路
風掠枯筇颯有聲
季子貂裘端已弊
吳中孤菜正堪烹
朱顏漸改功名晚
擊筑悲歌一再行

驛亭小憩遣興

淡日微雲共陸離
曲闌危棧出參差
老松臨道閱千載
杜宇號山連四時
漢水東流那有極
秦關北望不勝悲
郵亭下馬開孤劒
老大功名頗自期

再過龍洞閣

天險龍門道霜清客子遊一筇緣絕壁萬仞俯洪流著
脚初疑夢回頭始欲愁危身無補國忠孝兩堪羞

自笑

自笑謀生事事疎年來錐與地俱無平章春韭秋菘味
拆補天吳紫鳳圖食肉定知無骨相珥貂空自誑頭顱
惟餘數卷殘書在破篋蕭然笑獠奴

三泉驛舍

殘鐘斷角度黃昏小驛孤燈早閉門霜氣峭深摧草木

金匱山志卷三
風聲浩蕩卷郊原故山有約頻回首末路無歸易斷魂
短鬢蕭蕭不禁白強排幽恨近清樽

嘉川舖得檄遂行中夜次小柏

黃旗傳檄趣歸程急服單裝破夜行肅肅霜飛當十月
離離斗轉欲三更酒消頓覺衣裘薄驛近先看炬火迎
渭水函關元不遠著鞭無日涕空橫

歸次漢中境上

雲棧屏山閱月遊馬蹄初喜躡梁州地連秦雍川原壯

水下荆楊日夜流
遺敵孱孱寧遠略
孤臣耿耿獨私憂
良時恐作他年恨
大散關頭又一秋

沔陽夜行

夜發沔陽驛
坡陀岡阜重
月斜欹帽影
霜重溼裘茸
野岸鳴枯葉
煙林度曉鐘
梁州明日到
一笑解衰容

道中累日不肉食
至西縣市中得羊
因小酌

門外倚車轅
頽然就醉昏
棧餘羊絕美
壓近酒微渾
一洗窮邊恨
重招去國魂
客中無晤語
燈燼為誰繁

初離興元

夢裏何曾有去來高城無奈角聲哀連林秋葉吹初盡
滿路寒泥蹋欲開笠澤決歸猶小憩錦城未到莫輕回
炊菰斫膾明年事却憶斯遊亦壯哉

自興元赴官成都

平生無遠謀一飽百念已造物戲飢之聊遣行萬里梁
州在何處飛蓬起孤壘憑高望杜陵煙樹略可指今朝
忽夢破跋馬臨漾水此生均是客處處皆可死劔南亦

何好小憩聊爾爾舟車有通塗吾行良未止

書事

生長江湖狎釣船跨鞍塞上亦前緣雲埋廢苑呼鷹處
雪暗荒郊射虎天醪酒芳醇偏易醉胡羊肥美了無羶
楊州雖有東歸日閉置車中定悵然

雨中過臨溪古堠

道邊相送驛邊迎水隔山遮似有情歲晚無聊莫相笑
君方雨立我泥行

南沮水道中

磴舍臨湍瀨，冒船聚小潭。山形寒漸瘦，雪意莫方酣。久客情懷惡，頻來道路諳。家山空悵望，無夢到江南。

長木晚興

沮水嶠山名，古今聊將行役當。登臨斷橋煙雨，梅花瘦絕，礧風霜。樹深末路，清愁常衮衮，殘冬急景易駸駸。故巢東望，知何處空羨歸鴉，解滿林。

遣興

貂裘破弊色淒涼
塞上歸來路更長
老驥嘶鳴常伏櫪
寒龜藏縮正支牀
彫零客路新霜鬢
掃灑先師舊草堂
九折阪頭休絕歎
世間何地不羊腸

長木夜行抵金堆市

夜行長木村
重霧雜零雨
溼螢粘野蔓
寒犬吠雲塢
道壞交細泉
亭廢立遺堵
時時過農家
燈火照鳴杼
嗟予獨何事
無歲得安處
即今窮谷中
性命寄豺虎
三更投小市
買酒慰羈旅
高詠東山詩
悵望懷往古

赴成都泛舟自三泉至益昌謀以明年下三峽

詩酒清狂二十年又摩病眼看西川心如老驥常千里
身似春蠶已再眠莫雪烏奴停醉帽秋風白帝放歸船
飄零自是關天命錯被人呼作地仙

壬辰十月十三日自閬中還興元遊三泉龍門十

一月二日自興元適成都復攜兒曹往遊賦詩

勝地惜輕別短筇成後遊門呀一境異木落四山秋野
鵠翔深竇蟠蛟擅古湫棧危紫峭壁橋迫跨犇流白雨

穿林至腥風卷地浮真成起衰病不但洗孤愁登陟知
難再吟哦為小留回頭即萬里雪滿戴谿舟

予行蜀漢問道出潭毒關下每憩羅漢院山光軒
今復過之悵然有感

山光軒上幾閒遊潭毒關前又小留麥隴雪苗寒剌剌
柘林風葉莫颼颼馬行劒閣從今始門泊吳船亦已謀
醉眼每嫌天地窄盡將萬里著吾愁

棧路書事

危閣聞鈴馱湍流見磴船
汲江人負盎騎馬客蒙羶梨
美來秦地橙香接楚天
癡頑殊耐事隨處一欣然

雪晴行益昌道中頗有春意

杜陵雁下歲將殘
尺馬西遊雪擁關
顚顚敢忘雙闕路
淹遲遍看兩川山
春回柳眼梅鬚裏
愁在鞭絲帽影間
安得黃金成大藥
為人千載駐顏顏

思歸引

善泅不如穩乘舟
善騎不如謹持轡
妙於服食不如寡

欲工於揣摩不如省事在天有命誰得逃在我無求直
差易散人家風脫糾纏煙蓑雨笠全具天純絲老盡歸
不得但坐長飢須俸錢此身不堪阿堵役寧待秋風始
投檄山林聊復取熊掌仕宦真當棄雞肋錦城小憩不
淹遲即是輕舠下碇時那用更為麟閣夢從今正有鹿
門期

誌公院在劔門東五里院東石壁間有若僧負杖
者杖端髻髻有刀尺拂子之狀

江東爭奪纏妖祲哀哉斯民亂方甚錦幪老人蓋古佛
現身為作大慈蔭蕭翁八十尚兒癡旛蓋鍾螺鬧中禁
當時此老默笑渠大法棟梁身獨任杖頭示人三轉語
開口喪身如飲鴆紛紛放弒但可憐何曾為汝陳符讖
劔門道中遇微雨

衣上征塵雜酒痕遠遊無處不消魂此身合是詩人未
細雨騎驢入劔門

劔門關

劔門天設險北鄉控函秦客主固殊勢存亡終在人棧
雲寒欲雨關柳暗知春羈客垂垂老憑高一愴神

劔門城北回望劔關諸峯青入雲漢感蜀亡事慨

然有賦

自昔英雄有屈信危機變化亦逡巡陰平窮寇非難禦
如此江山坐付人

丹芝行

劔山峨峨挿穹蒼千林萬谷蟠其陽大丹九轉古所藏

靈芝三秀夜吐光如火非火森有芒朝陽欲升尚煌煌
何由剗取換肝腸往駕素虬朝紫皇

過武連縣北柳池安國院煮泉試日鑄顧渚茶院
有二泉皆甘寒傳云唐僖宗幸蜀在道不豫至
此飲泉而愈賜名報國靈泉云

滴瀝珠璣翠壁間遭時曾得奉龍顏欄傾甃缺無人管
滿院松風晝掩關

又

行殿淒涼迹已陳至今父老記南巡一泓寒碧無今古
付與閒人作主人

又

我是江南桑苧家汲泉閒品故園茶只應碧缶蒼鷹爪

可壓紅囊白雪芽

日鑄貯以小餅蠟紙丹印封之
顧渚貯以紅藍練囊皆有歲貢

宿武連縣驛

平日功名浪自期頭顱到此不難知
宦情薄似秋蟬翼鄉思多於春繭絲
野店風霜儗裝早縣橋燈火下程遲

鞭寒熨手戎衣窄忽憶南山射虎時

初入西州境述懷

我無飛仙術御氣周八極寸步常依人
難哉萬里役自行劒關南大道平如席
日高徐駕車薄暮亦兩驛及茲山愈遠
原野若加闊茂樹冬不凋寒花晚猶拆
昔我卜遠遊至蜀龜輒食弛裝有定處
嗚呼豈人力頗傳岷山下清淑無癘疫
士風尚豪舉意氣喜遠客薪米家可求
借書亦易得思吳雖不忘所願少休息
吾聞右達人雅

志在山澤豈無及物心但恨俗褊迫攬德雖成留引去
常勇決駭機滿人間著腳無上策

綿州魏成縣驛有羅江東詩云芳草有情皆礙馬
好雲無處不遮樓戲用其韻

老夫乘興忽西遊遠跨秦吳萬里秋尊酒登臨遍山寺
歌辭散落滿江樓孤城木葉蕭蕭下古驛灘聲瀲灩流
未許詩人誇此地茂林脩竹憶吾州

即事

金焦山志卷三
渭水岐山不出兵却攜琴劍錦官城醉來身外窮通小
老去人間毀譽輕捫蝨雄豪空自許屠龍工巧竟何成
雅聞嶠下多區芋聊試寒爐玉糝羹

青村寺

十年淹泊望修門臨水登山幾斷魂短鬢星星身欲老
小樓微月宿青村

行綿州道中

三年客江硤萬死脫魚鼃平地從今始窮塗敢復論園

畦棋局整坡壠海濤翻瘦犢應多恨泥塗伏短轅

越王樓

上盡江邊百尺樓倚欄極目莫江秋
未甘便作衰翁在兩脚猶堪蹋九州

又

蒲萄酒綠似江流夜燕唐家帝子樓
約住筦絃呼羯鼓要渠打散醉中愁

東津

歲莫涪江水歸壑白沙渺然石犂角蜀天常燠少雪霜
綠樹青林不搖落闌干詰曲臨官道煙靄參差望城郭
打魚斫膾修故事豪竹哀絲奉歡樂樂莫樂於新相知
美人一笑回春姿四方本是丈夫事安用一生無別離

東山

今日之集何佳哉入關劇飲始此回登山正可小天下
跨海何用尋蓬萊青天肯為陸子見妍日似趣梅花開
有酒如涪綠可愛一醉直欲空千壘駝酥鵝黃出隴右

熊肪玉白黔南來眼花耳熱不知夜但見銀燭高花摧
京華故人死太半歡極往往潛生哀聊將豪縱壓憂患
鼓吹動地聲如雷

綿州錄參廳觀姜楚公畫鷹少陵為作詩者

我來訪古涪之濱不辭百回冀一真走馬朝尋海樓館
斫膾夜醉魴魚津越王高樓亦已換俯仰今古堪悲辛
督郵官舍最卑陋棟撓楹腐知幾春巋然此壁獨亡恙
老槎勁翮完如新向來劫火何自免叱呵守護疑有神

妖狐九尾穴中國共置不問如越秦天時此物合致用
下韝指呼端在人會當原野灑毛血坐令萬里清煙塵
老眼還憂不及見詩成肝膽空輪囷

羅江驛翠望亭讀宋景文公詩

撲馬征塵拂不開高亭欹帽一徘徊蜀山地曠稀逢雪
閏歲春遲未見梅陂水近人無鷺下煙林藏寺有鐘來
宋公出牧曾題壁錦段雖殘試剪裁

鹿頭關過龐士元廟

士元死千載淒惻過遺祠海內常難合天心豈易知英
雄今古恨父老歲時思蒼蘚無情極秋來滿斷碑

遊漢州西湖

房公一跌輦衆毀八年漢州為刺史遶城鑿湖一百頃
島嶼曲折三四里小菴靜院穿竹入危榭飛樓壓城起
空濛煙雨媚松楠顛倒風霜老葭葦日月苦長身苦閒
萬事不理看湖水向來愛琴雖一癖觀過自足知夫子
畫船載酒凌湖光想公樂飲千萬場歎息風流今未泯

兩川名醞避鵝黃

鵝黃漢中酒名
蜀中無能及者

嚴君平卜臺

先生久已蛻氛埃
道上猶傳舊卜臺
乞得寒泉濯肝肺

真成萬里不虛來

臺後有大井名通仙
井相傳君平所浚

梅花

家是江南友是蘭
水邊月底怯新寒
畫圖省識驚春早
玉笛孤吹怨夜殘
冷淡合教閒處著
清臞難遣俗人看
相逢剩作樽前恨
索笑情懷老漸闌

拜張忠定公祠二十韻

張公世外人與蜀偶有緣天將靖蜀亂生公在人間厥
初大盜興樂禍迭相挺天子輟玉食貴臣擁戎旃生殺
出喜怒死者常差肩公曰此何哉從之吾欺天河流觸
地軸砥柱屹不遷脅從盡縱捨飛章交帝前上意竟開
悟至仁勝兇殘貴臣不極賞追還黜其權安危關社稷
豈惟蜀民全後來有阿童握兵事開邊晚策睦州功上
公珥金蟬勢張不可禦北鄉挑幽燕神京遂丘墟迄今

天步艱時無忠定公孰能折其奸我來拜遺祠喬木含
蒼煙死者不可作愀然衰涕潛憤切感虜旣慷慨思公
賢春秋送迎神誰為歌此篇

成都歲莫始微寒小酌遣興

革帶頻移紗帽寬茶鐺欲熟篆香殘疎梅已報先春信
小雨初成十月寒身似野僧猶有髮門如村舍強名官
鼠肝蟲臂元無擇遇酒猶能罄一歡

再賦梅花

老來愛酒賸狂顛
況復梅花到眼邊
不怕幽香妨靜觀
正須疎影伴癯仙
松筠共歎冰霜晚
桃李從教雨露偏
此去西湖八千里
破愁一笑得無緣

登壇

冷官無一事
日日得閒遊
壯哉千尺壇
攝衣上上頭
眼力老未減
足疾新有瘳
幸茲濟勝具
俯仰隘九州
雪山西北橫
大江東南流
畫棟雲氣涌
鐵鐸風聲遒
旅懷忽惻愴
涕下不能收
十年辭象魏
萬里懷松楸
仰視去天

咫尺絕叫當聞不帝閭守虎豹此計終悠悠

先主廟次唐貞元中張儼詩韻

猾賊挾至尊天命矜在已豈知高帝業煌煌漢中起

又

吳蜀本脣齒悲哉乃連兵盡銳下三硤誰使復兩京

又

洛陽化為灰棘生銅駝陌討賊志不成父老泣陵栢

廟在

惠陵

側

睡起書事

京華豪飲釀千鍾
濯錦江邊怯酒濃
烈士壯心雖未減
狂奴故態有誰容
折梅著句聊排悶
閉戶焚香剩放慵
午枕如雷君莫怪
西風吹夢過吳松

西郊尋梅

西郊梅花矜絕豔
走馬獨來看不厭
似羞流落蒙市塵
寧墮荒寒傍茆店
脩然自是世外人
過去生中差一念
淺顰常鄙桃李學
獨立不容鶯蝶覘
山礬水仙晚角出

大是春秋吳楚僭餘花豈無好顏色病在一俗無由砭
朱欄玉砌渠有命斷橋流水君何欠嗟余相與頗同調
身客劒南家在剡淒涼萬里歸無日蕭颯二毛衰有漸
尚能作意晚相從爛醉不辭盃湫澁

分韻作梅花詩得東字

淺寒籬落清霜後疎影池塘淡月中北客同春俱稅駕
南枝與我兩飄蓬從來遇酒千鍾少此外評花四海空
惟恨廣平風味減坐看徐庾擅江東

字丈子友聞予有西郊尋梅詩以詩借觀次其韻
拾遺遺跡付緇郎槁葉凝塵欲滿堂已恨罇罍孤勝餞
更堪風雨病幽芳蘭蓀千古有同調蜂蝶一春空自忙
馬上得詩歸絕歎故園三徑久成荒

海棠

范希
元園

誰道名花獨故宮

謂故蜀
燕王宮

東城盛麗足爭雄橫陳錦障

闌干外盡吸紅雲酒醖中貪看不辭持夜燭倚狂直欲
擅春風拾遺舊詠悲零落瘦損腰圍擬未工

老杜不應
無海棠詩

意其失

傳爾

簡南禪勤長老

官遊處處是君恩
歸去無期莫更論
眼正修行新有力
心空憂患已無根
鉢盂分我雲堂飯
拄杖敲君竹院門
屈宋向來堪一笑
故鄉何戀更招魂

和譚德稱送牡丹

洛陽春色擅中州
檀暈鞵紅總勝流
顚顚劒南人不管
問渠情味似儂不

又

吾生何拙亦何工
憂患如山一笑空
猶有餘情被花惱
醉搔華髮倚屏風

初到蜀州寄成都諸友

流落天涯鬢欲絲
年來用短始能奇
無材藉作長閒地
有憑留為劇飲資
萬里不通京洛夢
一春最負牡丹時
襍牋報與諸公道
罨畫亭邊第一詩

自蜀州暫還成都奉簡諸公

不染元規一點塵行歌偶到錦江濱淋漓詩酒無虛日
判斷鶯花又過春客路柳陰初墮絮還家梅子欲生仁
更須作意勤相遇要信年光屬散人

摩訶池

摩訶古池苑一過一消魂春水生新漲煙蕪沒舊痕年
光走車轂人事轉萍根猶有宮梁燕銜泥入水門

蜀宮
中舊

泛舟入此池曲折十餘里今府
後門雖已為平陸然猶號水門

三月十七日夜醉中作

前年膾鯨東海上白浪如山寄豪壯去年射虎南山秋
夜歸急雪滿貂裘今年摧頽最堪笑華髮蒼顏羞自照
誰知得酒尚能狂脫帽向人時大叫敵人未滅心未平
孤劒床頭鏗有聲破驛夢回燈欲死打窗風雨正三更

嘉祐院觀壁間文湖州墨竹

石室先生筆有神我來拂拭一酸辛敗牆慘澹欲無色
老氣森嚴猶逼人慣閱冰霜元耐久恥隨兒女更爭春
紛紛可笑空摹擬爾輩毫端萬斛塵

春晚書懷

吹盡郊原萬點紅
燕梁考室亦匆匆
老來偏覺歲華速
客裏忽驚春事空
病有藥方傳肘後
嬾無詩句付囊中

歸心日夜隨江水
只欲東門覓短篷

入吳者皆自
小東郭登舟

又

經春淹泊錦官城
作箇歸期苦未成
老向軒裳增力量
病於風月減心情
官閑有味緣高臥
酒貴無憂為細傾
憶採梅花如昨日
西塢榆莢與階平

又

老客天涯心尚孩惜春直欲挽春回長繩縱繫斜陽住
右手難移故國來暑近蚊雷先隱鱗雨前螳垤正崔嵬
茹芝却粒終無術萬事惟須付一盃

偶憶萬州戲作短歌

峽中天下最窮處萬州蕭條誰肯顧去年正月偶過之
曾為巴人三日住南浦尋梅雪滿舟西山載酒雲生屨
至今夢聽竹枝聲燈火紛紛驛前路殘春猶客蜀江邊

陳迹回思一愴然漸老定知歡漸少明年還復憶今年
驛舍見故屏風畫海棠有感

厭煩只欲長面壁此心安得頑如石杜門復出歎習氣
止酒還開慙定力成都二月海棠開錦繡裏城迷巷陌
燕宮最盛號花海霸國雄豪有遺迹猩紅鴨綠極天巧
疊萼重跗眩朝日繁華一夢忽吹散閉眼細思猶歷歷
憂樂相尋豈易知故人應記醉中詩夜闌風雨嘉州驛
愁向屏風見折枝

思政堂東軒偶題

羈愁酒病兩無聊
小篆吹香已半消
喚起十年閩嶺夢

賴桐花畔見紅蕉

賴桐嘉州謂之百日紅

荔枝樓小酌

碧瓦朱欄已半摧
強呼歌舞試樽罍
邦人莫訝心情嬾
新出鶯花海裏來

又

病與愁兼怯酒船
已歌聞罷更悽然
此身未死長為客

回首夔州又二年

嘉陽官舍竒石甚富散棄無領畧者予始取作假

山因名西魚曰小山堂為賦短歌

昔人何人愛巖壑為山未成儲瑩确散落支床壓酒槽
大或專車小拳握幽人邂逅為絕歎脩綆趣取寒泉濯
峭峯幽竇相吐吞翠嶺丹崖渺聯絡石不能言意可解
問我胡為憐寂寞人間興廢自有數昔棄何傷今豈樂
斯言妙矣予則陋敢對石友辭爵爵為君寬作十日留

在眼便同真著腳

望雲樓晚興

小閣東南獨詠詩此生終與世差池
夕陽明處蒼煙合
棲燕歸時畫角悲
人與江山均是夢
心非風月尚誰知
舊交幾歲音塵隔
三撫闌干有所思

護國天王院故神霄玉清萬壽宮也廢圯略盡而
規模尚極壯麗過之有感

太霄帝君神霄府一日璽書行海寓築宮奔走誰敢後

萬牛挽材山作礎步虛夜半落雲間玉磬淒淒鸞鶴舞
帝師丞相領使君侍晨校籍紛如雨洛陽臨淮小睥睨
御史立奏投裔土從來桑門喜嘲競舉國冠巾噤無語
古傳東海會揚塵君看此地亦荆榛霓旌仙仗空遺堵
甃缺臺傾知幾春牧兒驅牛齧庭草誰記劒佩來朝眞
斜陽却上筍輿去溝水冷泠愁殺人

登荔枝樓

平羗江水接天流涼入簾櫳已似秋喚作主人元是客

知非吾土強登樓
閒憑曲檻常忘去
欲下危梯更小留
公事無多厨釀美
此身不負負嘉州

薛能詩不負嘉州只負身


再賦荔枝樓

只道文書撥不開
未妨高處獨徘徊
山橫瓦屋披雲出
水自牂牁裂地來
暝入簾陰吹細雨
涼生樓角轉輕雷
癡頑也擬忘鄉國
不奈城頭暮角哀

能仁院前有石像丈餘蓋作大像時樣也

江閣欲開千尺像
雲龕先定此規模
斜陽徙倚空三歎

嘗試成功自古無



劔南詩彙卷三

欽定四庫全書

集部

劔南詩藁卷四

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劔南詩藁卷四

宋 陸游 撰

謁凌雲大像

出郭幽尋一笑新
徑呼艇子截煙津
不辭疾步登重閣
聊欲今生識偉人
泉鏡正涵螺髻綠
浪花不犯寶趺塵

一泉泓然正在髻下每歲漲水不能及佛足
始知神力無窮盡
丈六黃金果

小身觀無量壽經云或現小身丈六八尺

凌雲醉歸作

我媚月入平羌水歎息吾行俄至此謫仙一去五百年

至今醉魂呼不起玻瓈春滿琉璃鍾

玻瓈春眉
州酒名

宦情苦

薄酒興濃飲如長鯨渴赴海詩成放筆千觴空十年看
盡人間事更覺麴生偏有味君不見蒲萄一斗換得西
涼州不如將軍告身供一醉

獨遊城西諸僧舍

我是天公度外人看山看水自由身
蘚崖直上飛雙屐

雲洞前頭岸幅巾萬里欲呼牛渚月一生不受庾公塵
非無好客堪招喚獨往飄然覺更真

西林院

一邦盡對江邊像試比西林總不如

院門對大像最正

羣玉蕭

森開士宅五雲飛動相君書

寺額五字唐相裴徹書適美可愛

磴危漸

覺山爭出屐響方驚閣半虛安得棄官長住此一盃香
飯薦珍蔬

聽事前紫薇花二本甚盛戲題絕句

紅藥紫薇西省春從來惟慣對詞臣問囚自是麤官分
無奈名花解笑人

同何元立蔡肩吾至東丁院汲泉煮茶

一州佳處盡裴回惟有東丁院未來身是江南老桑苧
諸君小住共茶盃

又

雪芽近自嵯峨得不減紅囊顧渚春旋置風爐清樾下
他年奇事記三人

癸巳夏旁郡多苦旱惟漢嘉數得雨然未足也立
秋夜三鼓雨至明日晡後未止高下霑足喜而

有賦

畫簷鳴雨早秋天不喜新涼喜有年眼裏香杭三萬頃
寄聲父老共欣然

又

五十衰翁髮半華猶能把酒醉天涯絲毫美政何曾有
惟把豐年贈漢嘉

晚登望雲

一出修門又十年
輩流多已珥金蟬
衰如蠹葉秋先覺
愁似鰥魚夜不眠
輦路疎槐迎駕處
苑城殘日泛湖天
君恩未報身今老
徙倚危樓一泫然

又

晚來煙雨暗江干
烽火遙傳畫角殘
看鏡功名空自許
上樓懷抱若為寬
青楓搖落新秋令
白髮淒涼舊史官
飽見少年輕宿士
可憐隨處強追歡

立秋後十日風雨淒冷獨居有感

急雨鳴瓦溝尖風入窗罅紗籠耿青燈寂寂新秋夜誰
言簿領中乃復有此暇稍繙書冊讀已念灰火跨那知
是羈客恍若在家舍睡晚且熟眠洗沐官有假

明日晦
日也

晦日西窗懷故山

今朝休日仍無客茶罷西窗臥解衣白髮已侵殘夢境
綠苔應滿舊漁磯桃源雞犬塵凡隔杜曲桑麻夢想歸
賴有小山聊慰眼幽篁叢桂雨霏霏

秋日懷東湖

小閣東頭罨畫池秋來長是憶幽期身如巢燕臨歸日
心似堂僧欲動時病思羈懷惟付酒西風落日更催詩
故知歲莫常多感不獨當年宋玉悲

又

罨畫池邊小釣磯垂竿幾度到斜暉青蘋葉動知魚過
朱閣簾開看燕歸歲晚官身空自閔途窮世事巧相違
邊州客少已歌陋誰與愁城略解圍

小山之南作曲欄石磴繚繞如棧道戲作二篇

羈遊隨處得哦詩掃溉軒窗每恨遲已幻小山寬客恨
更添危磴作兒嬉偶留塞上寧無數徑返湖邊已有期
誰遣化工娛此老幽花微拆綠苔滋

又

吏退庭空剩得閒一窗如在翠微間半崖縈棧遊秦路
疊嶂生雲入剡山真有巖居臨絕壑但無漁艇繫寒灣
躋攀自苦君休笑寸步何曾不險難

得成都諸友書勸少留嘉陽戲作

一坐五十日癡頑良可哀
新涼為醉地少訟作慵媒
市

柳風煙慘汀蘋歲月催
遠官從漫浪垂老嬾低回

市柳汀蘋

皆屬唐安

道院

四壁長苔痕經旬掩綠樽
雨聲清夢境燈影伴吟魂
搖落悲徂歲漂流憶故園
擬騷無傑語千古愧湘沅

醉中感懷

早歲君王記姓名只今顚顚客邊城青衫猶是鷓鴣行舊
白髮新從劒外生古戍旌旗秋慘淡高城刁斗夜分明
壯心未許全消盡醉聽檀槽出塞聲

玻瓈江

眉州共飲亭蓋取東坡共飲玻瓈江之句追懷舊遊戲作以補西州樂府

玻瓈江水千尺深不如江上離人心君行未過青衣縣
妾心先到峨嵋陰金樽共釀不知曉月落煙渚天橫參
車輪無角那得住馬蹄不方何處尋空憑尺素寄幽恨
縱有綠綺誰知音愁來只欲掩屏睡無奈夢斷聞疎砧

古樂府安得雙車輪一夜生四角唐人詩云長安
塵土中馬蹄圓重重郎馬蹄不方何處認郎蹤

夜思

蒼顏華鬢久低摧歎息何堪歲月催殘暑已隨團扇去
新涼還傍短檠來月痕澹澹侵苔砌雲葉蕭蕭覆水臺
簿領沈迷無日了試憑詩思洗氛埃

雨夜懷唐安

歸心日夜逆江流官柳三千憶蜀州小閣簾櫳頻夢蝶
平湖煙水已盟鷗螢依溼草同為旅雨滴空階別是愁

堪笑邦人不解事區區猶借陸君留

蜀人舊語謂唐安有三十官柳四千

琵琶淫螢依草

沒梅宛陵詩

迎詔書

憶瞻鑾仗省門前
扇影鞭聲下九天
寂寞嘉州迎詔處
忽聞鼓吹却悽然

秋夜遣懷

江雲傍簷山雨細
羈客空堂臥荒翳
心如秋燕不安巢
迹似春萍本無柢
官身奔走何時定
病眼蒙籠惟欲閉

壯遊不復記墜鞭夜語誰能懷擁髻詩情已減但微吟
酒戒漸堅纔小嘯從今更擬著幽禪半世佺佺真誤計

送客至江上

多事經旬不出城今朝送客此閒行郊原遠帶新晴色
人語中含樂歲聲天際歛雲山盡出江流收漲水初平
故園社友應惆悵五歲無端棄耦耕

雨中至西林寺

胷中荊棘費鉏耰正藉幽尋暫解紛不盡長江來畫玉

半空飛閣對凌雲昏昏橫靄憑軒見杳杳疎鐘隔岸聞
珍重山僧迎客意螭奩一縷起微熏

小軒下臨羊江
發源自大渡河

休日登花將軍廟小樓

林間縹緲出層樓欄角蒼茫萬頃秋曾是胸中著雲夢
不妨此地少遲留

深居

作吏難堪簿領迷深居聊復學幽棲病來酒戶何妨小
老去詩名不厭低零落野雲寒傍水霏微山雨晚成泥

自憐甫里家風在小摘殘蔬遶廢畦

秋夜獨醉戲題

敝袍羸馬遍天涯恰似伶優著處家
社甕嫩醅初泛蟻寒缸殘燼自成花
幽窗照影烏巾折醉手題詩淡墨斜
莫恨久為峨下客江湖歸去得雄誇

感事

清班曾見六龍飛晚落天涯遠日畿邊
月空悲新雪鬢京塵猶染舊朝衣江山
壯麗詩難敵風物蕭條醉絕稀

賴有東湖堪吏隱寄聲籬菊待吾歸

醉鄉

醉鄉卜築亦佳哉但苦無情白髮催癡欲煎膠黏日月
狂思入海訪蓬萊辭巢歸燕先秋去泣露幽花近社開
莫惜傾家供作樂古人白骨有蒼苔

夜讀岑嘉州詩集

漢嘉山水邦岑公昔所寓公詩信豪偉筆力追李杜常
想從軍時氣無玉關路

公詩多從戎
西邊時所作

至今蠹簡傳多昔

橫槩賦零落財百篇崔嵬多傑句工夫刮造化音節配
韶護我後四百年清夢奉巾履晚途有奇事隨牒得補
處羣敵自魚肉明主方北顧誦公天山篇流涕思一遇
次韻師伯渾見寄

眉山漢嘉東西州估船日日到津頭不得講書一行字
倚遍臨江百尺樓黃鐘大呂忽復見繡段英瑤何足酬
願約青神王夫子來醉萬景作中秋

社前一夕未昏輒寢中夜乃得寐

祠事當行懼不任
未昏強卧擁孤衾
三更自笑元無睡
萬事從來忌有心
簷角河傾秋耿耿
床頭蟲語夜恹恹
若耶溪上蘋花老
倦枕何人聽越吟

晚雨

蕭瑟度橫塘
霏微映繚牆
壓低塵不動
灑急土生香
聲入楸梧碎
清分枕簟涼
回頭忽陳迹
簷角挂斜陽

社日

百穀登場酒滿卮
神林蕭鼓晚清悲
蟬依疎柳長言處

燕委空巢大去時幼學已忘那用忌

鄉俗小兒女社日忌習業

微聾

自樂不須醫

古謂社酒治聾

傷心故里雞豚集父老逢迎正見

思

夜雨感懷

老來每惜歲崢嶸幾為巴歌判宿醒白帝草生時入夢
錦官花重更關情簾疎夜雨侵燈暈枕冷秋風遞角聲
定許何時理歸棹酒狂猶解賦燕城

八月二十二日嘉州大閱

陌上弓刀擁寓公水邊旌旆卷秋風書生又試戎衣窄

山郡新添畫角雄

郡舊止角四枝
近方增如式

早事樞庭虛畫策晚

遊幕府媿無功草間鼠輩何勞磔要挽天河洗洛嵩

九月六夜夢中作笑詩覺而忘之明日戲追補一

首

吾家笑疾自士龍我才雖卑笑則同紛紛世事何足計
盡付撫掌掀髯中清樽可醉風月好虛空萬象皆絕倒
問君此笑是喜不道得老夫輸一籌

重九會飲萬景樓

粲粲黃花手自持登高聊當此佳時
纖雲不作看山崇斗酒聊寬去國思
落日樓臺頻徙倚西風鼓笛倍淒悲
彭城戲馬平生意強為巴歌一解頤

是日作竹枝歌舞

久客書懷

行役飽看山沉綿刺得閒忘憂緣落魄耐老為癡頑
射虎臨秦塞騎驢入蜀關芳洲蘭可佩幽磴桂堪攀
欵乃聲饒楚取隅句帶蠻

嘉州帶袁董諸蠻

悠然長自遣故里幾時

還

初報嘉陽除官還東湖有期喜而有作

塞上經秋幾醉醒
羈愁減盡鬢邊青
烽傳八詔登樓看

歌奏三巴忍淚聽
好語忽聞還印綬
歸心先已繞林垌

呼兒結束從今日
鵲語燈花故有靈

累夕燈有花今早鵲聲遠舍皆紀實

事

聞勾龍司戶會客山亭送酒殽及橄欖并簡諸同

僚

東山如高人吾輩豈易見君獨不出門終日與相面陰
晴煙雨月朝莫知幾變聞君交不瀆冠佩未嘗燕弛張
要有時一笑山未譴高秋得佳日折簡喚諸彥風流非
俗飲歌舞參筆硯但恨五日尹阻造三語掾余方臥疾清樽
遣分似霜果亦可薦爛醉君勿辭光景真掣電

九月十六日夜夢駐軍河外遣使招降諸城覺而
有作

殺氣昏昏橫塞上東並黃河開玉帳晝飛羽檄下列城

夜脫貂裘撫降將將軍檉上汗血馬猛士腰間虎文韞
階前白刃明如霜門外長戟森相向朔風卷地吹急雪
轉盼玉花深一丈誰言鐵衣冷徹骨感義懷恩如挾纜
河外諸城一洗空太行北嶽元無恙更呼斗酒作長歌
要遣天山健兒唱

何元立示九日詩臥病累日乃能次韻

何郎戲寫菊花秋落筆縱橫豈易酬豪士乃能為老伴
寓公那得稱遨頭早衰不耐危亭冷

夜冷憑牕翁亭獨
欄杆得疾數日

臥空驚畫角愁病起尚思尋宿約一樽從子醉東樓

成都行

倚錦瑟擊玉壺吳中狂士遊成都成都海棠十萬株繁
華盛麗天下無青絲金絡白雪駒日斜馳遣迎名姝燕
脂褪盡見玉膚綠鬟半脫嬌不梳吳綾便面對客書斜
行小草密復疎墨君秀潤瘦不枯風枝雨葉筆筆殊月
浸羅襪清夜徂滿身花影醉索扶東來此歡墮空虛坐
悲新霜點鬢鬚易求合浦千斛珠難覓錦江雙鯉魚

聞敵亂有感

前年從軍南山南夜出馳獵常半酣
玄熊蒼兕積如阜赤手曳虎毛
參參有時登高望鄠社悲歌仰天淚如雨
頭顱自揣已可知一死猶思報明主
近聞敵人自相殘秋風撫劒淚沈瀾
雒陽八陵那忍說玉座塵昏松柏寒
儒冠忽忽垂五十急裝何由穿
袴褶羞為老驥伏櫪悲寧作枯魚過河泣

古樂府枯魚詩云枯魚過河泣何時復還入作書與魴鱖相教謹出入

醉歌

我飲江樓上闌干四面空手把白玉船身遊水精宮方
我吸酒時江山入胷中肺肝生崔嵬吐出為長虹欲吐
輒復吞頗畏驚兒童乾坤大如許無處著此翁何當呼
青鸞更駕萬里風

初寒

江路常逢雨山城早得寒蘭凋初解佩菊老尚加餐

嘉陽

有崇蘭以八九月盛開

節物知何負情懷自鮮歡浮生看已熟不

必夢邯鄲

木山

枯楠千歲遭風雷披枝折幹吁可哀輪囷無用天所赦
秋水初落浮江來嵌空宛轉若耳鼻峭瘦拔起何崔嵬
珠宮貝闕留不得忽出洲渚知誰推書窗正對雲洞啟
翫菊初傍幽篁栽是間著汝頗宜稱摩挲朝莫真千回
天公解事雨十日洗盡泥滓滋莓苔一丘一壑吾所許
不須更慕明堂材

寒夜遣懷

臨觴本不飲憂多自成醉
四方行萬里不見埋憂地
憶昔入京都寶馬搖香鬃
酣飲青樓夜歌聲在半空
去日不可挽華髮忽垂領
娟娟峨眉月相對作淒冷
月落照空床不寐聽寒蛩
早知憂隨人何用去故鄉

嘉陽絕無木犀偶得一枝戲作

久客紅塵不自憐
眼明初見廣寒仙
只饒籬菊同時出
尚占江梅一著先
重露溼香幽徑曉
斜陽烘盡小窗妍
何人更與蒸沉水
金鴨華燈惱醉眠

雨後登西樓獨酌

老覺人間無一欣
強尋高處看歸雲
天空列嶂開圖畫
水落寒江學篆文
四海道途行大半
百年光景近中分
交遊賴有麴生在
正向愁時能策勲

喜晴

西風吹雨冷淒淒
道上行人白晝迷
聊扶重雲取朝日
未容嘉穀臥秋泥
年豐郡府疎文檄
蠻遁邊亭息鼓鼙
寄語農家莫遊惰
冬閒正要飽鉏犁

曉出城東

渺渺長江下估船
亭亭孤堦隱蒼烟
不堪異縣蕭條地
更遇初寒慘澹天
巾褐已成歸有約
簞瓢未足去無緣
包羞強索侏儒米
豪舉何人記少年

寶劍吟

幽人枕寶劍殷殷夜有聲
人言劍化龍直恐興風霆
不然憤狂敵慨然思遐征
取酒起酌劍至寶當潛形
豈無知君者時來自施行
一匣有餘地胡為鳴不平

十月一日浮橋成以故事宴客凌雲

陰風吹雨白晝昏誰掃雲霧升朝暾三江水縮獻洲渚
九頂秀色欲塞門西山下竹十萬箇江面便可馳車轅
巷無居人亦何怪釋未來看空山村竹枝宛轉秋猿苦
桑落湫澍春泉渾衆賓共醉忘燭跋一徑却下緣雲根
走沙人語若潮卷爭橋炬火如星繁肩輿睡兀到東郭
空有醉墨留衫痕十年萬事俱變滅點檢自覺惟身存
寒燈夜永照耿耿賦長句招羈魂

金匱要略卷四
聞王嘉叟訃報有作

嗚呼嘉叟今信死
哭君寢門淚如水
我初入都不妄交
傾倒如君數人耳
籠燈蹋雪夜相過
劇論懸河駭隣里
地爐燔栗美芻豢
石鼎烹茶當醪醴
上書去國何勇決
作詩送君猶壯偉
十年偶復過都門
君方草制西垣裏
鬢鬚班白面骨生
心頗疑君遽如此
西來例不候達官
每欲寄聲中輒止
隻雞絮酒縱有時
雙魚素書長已矣
生前客履紛滿戶
身後人情薄於紙
懸知海內莆陽公

謂陳丞相

獨念遺孤為經紀

出城至呂公亭按視修堤

翠靄橫山澹日昇孤亭聊借曲欄憑霜威漸重江初縮

農事方休役可興重阜護城高歷歷千夫在野築登登

寓公僅踵前人迹伐石西山恨未能

西州築堤織竹貯江石不三年輒壞

意謂如吳中取大石甃成則可支久異日當有辨此者

登樓

從來好境遍人間無奈勞生自欠閒江近時時吹白雨

樓高面面看青山歌聲哀怨傳三硤行色淒涼帶百蠻

嘉陽近諸蠻流落愛君心未已夢魂猶綴紫宸班

醉中作

晚途豪氣未低摧一飲猶能三百盃爛爛目光方似電

勦勦鼻息忽如雷

又

駕鶴孤飛萬里風偶然來憩大峨東持盃露坐無人會

要看青天入酒中

又

曾賜琳腴白玉京
狂歌起舞蜀人驚
却騎黃鶴橫空去
今夕垂虹醉月明

又

畫角三終夜未闌
醉憑飛閣喜天寬
月明滿地江風急
吹落幽人紫綺冠

觀大散關圖有感

上馬擊狂天下馬
草軍書二十抱此志
五十猶癯儒大

散陳倉間山川鬱盤紆勁氣鍾義士可與共壯圖坡陀
咸陽城秦漢之故都王氣浮夕靄宮室生春蕪安得從
王師汎掃迎皇輿黃河與函谷四海通舟車士馬發燕
趙布帛來青徐先當營七廟次第畫九衢偏師縛可汗
傾都觀受俘上壽大安宮復如正觀初丈夫畢此願死
與螻螳殊志大浩無期醉膽空滿脣

嘉州守宅舊無後圃因農事之隙為種花築亭觀
甫成而歸戲作長句

吾州山水西州冠正欠雄樓並傑觀奇峯秀嶺待彈壓
明月清風須判斷三峨舊不到郡齋創為詩人供几案
煙雲舒卷水墨圖草木青紅錦繡段一時冠蓋共登臨
百年父老俱驚惋紫回舞袖試弓彎宛轉歌聲學珠貫
佳人蜂蝶爭遶鬢上客龍蛇看揮翰寓公雖作一月留
梅發東湖歸思亂兒戲聊成此段奇陳迹應留後人歎
明朝艇子沂平羌却伴謫仙遊汗漫

連日扶病領客殆不能支枕上懷故山偶成

已強迂疎假印章更扶衰病主盃觴功名已判初心負
豪俠都無故態狂靜覺此身猶外物嬾思與世永相忘
清泉白石生來事曲几明窗味最長

余往與宇文叔介同客山南今年叔介客死臨安
十月十一日夜忽夢相從取架上書共讀如平
生讀未竟忽辭去留之不可曰欲歸校藥方既
覺泣然不能已因賦此詩

羈魂顚顚遠相尋髭斷肩寒帶苦吟歸校藥方緣底事

知君死抱濟時心

金錯刀行

黃金錯刀白玉裝
夜穿窗扉出光芒
丈夫五十功未立
提刀獨立顧八荒
京華結交盡奇士
意氣相期共生死
千年史策恥無名
一片丹心報天子
爾來從軍天漢濱
南山曉雪玉嶙峋
嗚呼楚雖三戶能亡秦
豈有堂堂中國空無人

言懷

蘭碎作香塵竹裂成直紋炎火熾崐岡美玉不受焚孤
生抱寸志流離敢忘君釀桂餐菊英潔坐三沐熏孰云
九關遠精意當徹聞捐軀誠有地賈勇先三軍不然齋
恨死猶冀揚清芬願乞一棺地葬近要離墳

十月十九日與客飲忽記去年此時自錦屏歸山
南道中小獵今又將去此矣

去年縱獵韓壇側玉鞭自探南山雪今年痛飲蜀江邊
金盃却吸峨嵋月竹枝歌舞新教成淒怨傳得三巴聲

城頭築觀出雲雨峨嵎正與闌干平酒酣詩就擲盃去
醉蹋玻瓈江上路懸知幽磴斷橋邊已有梅花開半樹

冬日

短景忽忽過新寒疊疊來客遊聊戲耳世事亦悠哉綠
動連村麥香吹到處梅錦城花柳窟歸去看春回

十月十四夜月終夜如晝

月從海東來徑尺鎔銀盤西行到峨嵎玉宇萬里寬幽
人耿不寐弄影清夜闌五城十二樓縹緲香霧間不知

何仙人亭亭倚高寒欲語不得往悵望冰雪顏叩頭僮
見哀容我躡素鸞掬露以為漿屑玉以為餐泠泠漱齒
頰皓皓濯肺肝逝將從君遊人間苦無歡

下元日五更詣天慶觀寶林寺

朝罷琳宮謁寶坊強扶衰疾具簪裳擁裘假寐籃輿穩
夾道吹煙樺炬香樓外曉星猶磊落山頭初日已蒼涼
鳴騶應有高人笑五斗驅君早夜忙

梅花

老厭紛紛漸鮮歡愛花聊復客江干月中欲與人爭瘦
雪後偷憑笛訴寒野艇幽尋驚歲晚紗巾亂插醉更闌
尤憐心事淒涼甚結子青青亦帶酸

又

月地雲階暗斷腸知心誰解賞孤芳相逢只怪影亦好
歸去始驚身染香渡口耐寒窺淨綠橋邊凝怨立昏黃
與卿俱是江南客剩欲尊前說故鄉

又

玄冥行令肅冰霜牆角疎梅特地芳
屑玉定煩修月戶堆金難買破天荒
了知一氣環無盡坐笑千林凍欲僵
力量世間誰得似挽回歲律放春陽

又

折得名花伴此翁詩情恰在醉魂中
高標不合塵凡有尤物真窮造化功
霧雨更知仙骨別鉛丹那悟色塵空
前身姑射疑君是問道端須順下風

西園

半掩朱門蘚徑斜
翠屏繡谷忽谿牙
高高下下天成景
密密疎疎自在花
江近夕陽迎宿鷺
林昏殘角促歸鴉
吾舟已繫津南岸
喚客猶能一笑譁

塞上行

鬚如蝟毛磔面如紫石稜
丈夫出門無萬里風雲之會
立可乘追犇露宿青海月
奪城夜蹋黃河水鐵衣度磧
雨颯颯戰鼓上隴雷憑憑
三更窮敵送降款天明積甲
如丘陵中華初識汗血馬
邊徼再貢霜毛鷹羣陰伏太

陽昇敵退塞宋中興丈夫報主有如此笑人白首蓬窗
燈

公無渡河

間雅安守溺死於嘉陵江代其家人作

大莫大於死生親莫親於骨肉河不可憑兮非有難知
言之不從兮繼以痛哭望雲九井兮白浪嵯峨剝肝瀝
血兮不從奈何秋風颯颯兮紙錢投波從公於死兮下
飽蛟鼉

長門怨

寒風號有聲寒日慘無暉空房不敢恨但懷歲莫悲今年選後宮連娟千蛾眉早知獲譴速悔不承恩遲聲當徹九天淚當達九泉死猶復見思生當長棄捐

長信宮詞

憶年十七兮初入未央護侍步輦兮恭承寵光地寒祚薄兮自貽不祥讒言乘之兮畢釁日彰既來嵯峨兮勢如壤牆當伏重誅兮鼎耳劒鉞長信雖遠兮匪棄路旁歲給絮帛兮月賜稻粱君舉玉食兮屏箸誰嘗君御朝

金定四庫全書
衣兮誰進熏香婕妤才人兮儼其分行千秋萬歲兮永
奉君王妾雖益衰兮尚供蠶桑願置繭館兮組織玄黃
欲訴不得兮仰呼蒼蒼佩服忠貞兮之死敢忘

銅雀妓

武王在時教歌舞那知淚灑西陵土君已去兮妾獨生
生何樂兮死何苦亦知從死非君意偷生自是慙天地
長夜昏昏死實難孰知妾死心所安

得韓元咎書寄使敵時宴東都驛中所作小閨

大梁二月杏花開錦衣公子乘傳來桐陰滿地掃不得
金轡玲瓏上源驛上源驛中搥畫鼓漢使作客誰作主
舞女不記宣和粧廬兒盡能學邊語書來寄我宴時詩
歸鬢知添幾縷絲有志未須深感慨築城會據拂雲祠

唐中受降城

在拂雲祠

曉坐

低枕孤衾夜氣存披衣起坐默忘言
餅花力盡無風墮
爐火灰深到曉溫空橐時時聞鼠齧小窗一一送鴉翻

悠然忽記幽居日下榻先開水際門

斷碑歎

興元姚節度園以折碑為石筍文猶可識
蓋梁蕭懿墓碑簡文為太子時撰書法道

美可

愛

二蕭同起南蘭陵正如文叔與伯升至今人悲大蕭死
齊恨不見梁家興崇崇之陵久為谷豈惟羣盜分珠玉
斷碑槎牙棄道邊文字班班猶可讀剝剝苔蘚一悽然
俯仰人間幾變遷世人作碑君勿哂千載園林須石筍
夜行至平羌憩大悲院

憶昨遊天台夜投石橋宿水聲亂人語炬火散山谷穿
林有驚鶻截道多犇鹿今夕復何夕此境忽在目蒼茫
陂十里清淺溪數曲微霜結表葺落葉拂帽屋下馬憩
村寺頽然睡清熟覺來窗已白殘燈猶煜煜

迂益帥馬上作

馬上遙看江上山白雲紅樹畫圖間經年簿領無休日
却向忙中得少閒

蜀酒歌

漢州鵝黃鸞鳳雛不驚不搏德有餘眉州玻瓈天馬駒
出門已無萬里塗病夫少年夢清都曾賜虛皇碧琳腴
文德殿門晨奏書歸局黃封羅百壺十年流落狂不除
遍走人間尋酒壚青絲玉瓶到處酤鵝黃玻瓈一滴無
安得豪士致連車倒瓶不用杯與盃琵琶如雷聒坐隅
不愁渴死老相如

十一月八日夜燈下對梅花獨酌累日勞甚頗自

慰也

奔走人間無已時
夜窗喜對出塵姿
移燈看影憐渠瘦
掩戶留香笑我癡
冷豔照杯欺麴蘖
孤標逼硯結冰澌
本來難入繁華社
莫向春風怨不知

醉後草書歌詩戲作

朱樓矯首隘八荒
綠酒一舉累百觴
洗我堆阜崢嶸之
胸次寫為淋漓放縱之詞章
墨翻初若鬼神怒
字瘦忽作蛟螭僵
寶刀出匣揮雪刃
大舸破浪馳風檣
紙窮擲筆霹靂響
婦女驚走兒童藏
往時草檄喻西域
颯颯聲

動中書堂

余嘗草丞相魯公以下
與夏國主書於政事堂

一收朝跡忽十載西

掠三巴窮夜郎山川荒絕風俗異賴有酒美猶能狂醉
中自脫頭上憤綠髮未許侵微霜人生得喪良細事孰
謂老大多悲傷

古藤杖歌

我有古藤杖夭矯蛟龍形生於峭壁絕磴上乃是曾稽
山陰之蘭亭歷吳入楚上巴硤北遊直看秦山青夜飛
或隨暴雨去旦歸常帶流漿腥與子扶攜各老大勿復

狡獪誇神靈惛惛從此常倚壁聽我夜誦黃庭經

歲晚書懷

殘歲堂堂去新春鼎鼎來夢移鄉國近酒挽壯心回
暝律初催柳晴光併上梅東湖有歸日衰抱得頻開

已遣人還

新守

累日倦甚不能觴客睡起戲作

粉閣紅薦罇俎薄不如止酒得安眠無心已破浮生夢
有力聊輕造化權脫髮滿梳真老矣斷香縈几故翛然

晚知古佛中邊語正合蒙莊內外篇

種花

西園作戲喚春回桃李陰陰三萬栽不是無心看開遍

錦江煙柳待歸來

時將還成都

雨中登樓望大像

去年寒雨中騎驢度劔閣今年當此時臥聽邊城柝
巍千尺像與我兩寂寞交遊閱四海此老差可託但當
頻自省諸惡誓莫作時時一憑高相望要不忤桑間戒

三宿堅坐豈渠樂却應輸老夫新春買芒屨

迎赦呈王志夫李德孺師伯渾

平明置騎傳詔函帝意欲與東皇參青城回仗國人喜

金雞銜赦天恩覃吾君愛民靡不到黃紙字密如吳蠶

紀元故事極用九聖政盡美方登三

赦書改
明年元

嗟余久已

去魏闕夢想豹尾猶參參過郊一月方拜赦始知身落

天西南歡呼已怪衰病愈蹈舞更覺春風酣何當與子

歸共載二月起柁江如藍

冬日

幸是元無了事癡偷閒聊復學兒嬉
午窗弄筆臨唐帖
夜几研朱勘楚詞
山暝已無梅可折
江清猶有蟹堪持
舊交乖隔音塵斷
安得歌呼共一卮

蜀中惟嘉州有蟹

雨中睡起

磔磔寒禽無定棲
纖纖小雨欲成泥
松鳴湯鼎茶初熟
雪積爐灰火漸低
一氣推移均野馬
百年蒙覆等醯雞
青山黃葉蘭亭路
憶喚鄰翁共架犁

十二月初一日得梅一枝絕奇戲作長句今年於是四賦此花矣

高標已壓萬花羣尚恐嬌春習氣存
月兔擣霜供換骨湘娥鼓瑟為招魂
孤城小驛初飛雪斷角殘鐘半掩門
盡意端相終有恨夜寒皴玉倩誰溫

無題

畫閣無人晝漏稀離悰病思兩依依
釵梁雙燕春先到第柱羈鴻暎不歸
迎得紫姑占近信裁成白紵寄征衣

金史曰卷之三十一
卷四
晚來更就隣姬問夢到遼陽果是非

快晴

地闢天開斗柄回今朝紅日遍池臺新陽蘇醒春前柳
輕暖醫治雪後梅瓦屋螺青披霧出錦江鴨綠抱山來
衰翁也逐兒童喜旋撥文書近酒盃

獨坐

巾帽欹傾短髮稀青燈照影夜相依窮邊草木春遲到
故國湖山夢自歸茶鼎松風吹謾謾香奩雲縷散翻翻

羸驂敢復和鑾望只願連山首猶肥

十二月十一日視築隄

江水來自蠻夷中五月六月聲摩空巨魚穹龜牙鬚雄
欲取闕市為龍宮橫隄百丈臥霹虹始誰築此東平公
今年樂哉適歲豐吏不相倚勇赴功西山大竹織萬籠
船舸載石來亡窮橫陳屹立相疊重置力尤在水廟東
我登高原相其衝一盾可愛百箭攻蜿蜿其長高隆隆
截如長城限羌戎安得椽筆記始終挿江石崖堅可礮

題龍鶴菜帖

東坡先生元祐中與其里人史彥明主簿書云新春龍鶴菜羹有味舉箸

想復見

憶邪

先生直玉堂日羞太官羊如何夢故山曉枕春蔬香春
蔬尚云爾沉我舊朋友萬里一紙書殷勤問安否先生
高世人獨恨不早歸坐令龍鶴菜猶愧首陽薇

春愁曲

客話成
都戲作

處義至今三十餘萬歲春秋歲歲常相似外大瀛海環
九洲無有一洲無此愁我願無愁但歡樂朱顏綠鬢常

如昨金丹九轉徒可聞玉兔千年空擣藥蜀姬雙鬟姪
姹嬌醉看恐是海棠妖世間無處無愁到底事難過萬
里橋

荀秀才送蠟梅十枝奇甚為賦此詩

與梅同譜又同時我為評香似更奇痛飲便判千日醉
清狂頓減十年衰色疑初割蜂脾蜜影欲平欺鶴膝枝
插向寶壺猶未稱合將金屋貯幽姿

離嘉州宿平羌

初挈囊衣宿水村蕭然一掃舊巢痕本來信手忘工拙
却為無心少怨恩自笑遠遊諳馬上已營小築老雲根
淡煙疎雨平羌路便恐從今入夢魂

瑞草橋道中作

經年簿書無少暇款段今朝欣一跨瑞草橋邊水亂流
青衣渡口山如畫老翁醉著看龍鍾小婦出窺閨姪妣
荒陂吹笛晚呼牛古路倚梯晨采柘殘花零落不禁折
香草芊茸如可藉郵亭慈竹筍穿籬野店蒲萄枝上架

功名垂世端有數利欲昏心喜乘罇羈窮自笑豈人謀
閒放每欲從天借草根蟲語祇自悲風裏蓬征安稅駕
祖師補處浣花村會傍清江結茆舍

遊修覺寺

上盡蒼崖百級梯詩囊香椀手親攜山從飛鳥行邊出
天向平蕪盡處低花落忽驚春事晚樓高剩覺客魂迷
興闌掃榻禪房臥清夢還應到剡溪

晚步湖上

雲薄漏春暉湖空弄夕霏沾泥花半落掠水燕交飛小
倦聊扶策新晴旋減衣幽尋殊未已畫角喚人歸

莫春

忙裏偷閒慰晚途春來日日在東湖凭欄投飯看魚隊
挾彈驚鴉護雀雛俗態似看花爛漫病身能鬪竹清癯
一樽是處成幽賞風月隨人不用呼

池上醉歌

我欲築化人中天之臺下視四海皆飛埃又欲造方士

入海之舟破浪萬里求蓬萊
取日挂向扶桑枝留春挽
回北斗魁橫笛三尺作龍吟
腰鼓百面聲轉雷飲如長
鯨海可竭玉山不倒高崔嵬
半酣脫幘髮尚綠壯心未
肯成低摧我妓今朝如花月
古人白骨生蒼苔後當視
今如視古對酒惜醉何為哉

四月五夜見螢

蜀州官居富水竹四月螢火遶梁飛
流年迫人不相貸
客子倦遊何日歸

塞上曲

三尺鐵如意一枝玉馬鞭
笑把出門去萬里行無前
當道何崔嵬云是玉門關
方當置屯守征人何時還
馬色如雜花鎧光若流水
肅肅不敢譁遙望但塵起
日落戍火青煙重塞垣紫
回首五湖秋西風開芡觜

夜聞塙鈴及泉聲

山泉瀉幽竇塙鈴搖天風
清音無時盡靜夜尤琤琮
嗟我走紅塵市聲聒欲聾
多生耳根業賴此一洗空
夢騎

白鳳凰佩玉朝珠宮覺來撫枕歎月滿草堂中

劍南詩藁卷四